

薛建吾著

行素軒詩集

薛  
建  
吾  
著

行  
素  
軒  
詩  
集

拾遺補白

日 月 潭

觀島櫻花爛漫開 香車寶馬出中臺 多情日月潭中水 會照鷺鴻麗影來  
千峯競抱光華島 萬澗爭奔日月潭 水內有山山內水 青山綠水碧樓瀾  
桃岸垂綸花裏坐 明潭撥棹鏡中行 邀來水社村前月 驚起魚池樹上鶯  
椰陰深處有番家 公主濃裝舞袖斜 解得自然真樂趣 杵歌嘹亮落幽花

阿里山神木

擎雲攫日逞雄才 拄地擎天勢鬱崔 大匠難逢靈木歎 年年空谷嘯風雷

阿里山原生林

縱然脫得斧斤災 卻向空山老異才 安得魯班千百輩 平添無數棟樑材

和黃壁山先生

丙戌秋奉令調職冬視察臺南嘉義各級地方教育邂逅老友黃壁山先生於諸羅城

下承贈七律兩章依韻奉和致謝

聚散無端短復悠 范公隄上喜相逢 唐祠馬帳商新學 草堰鴻泥印舊踪 兵燹餘  
生驚世變 戰爭浩劫歎雷同 劇憐吾道行難望 強自乘桴犯海風  
海外相逢別廿年 喜教風雨爰床連 邇來鈇鉞全增價 世亂文章不值錢 知命每  
慚成器晚 匡時常羨著鞭先 樹人大業權評隘 天用吾才敢怨偏

## 序

我友薛建吾君擅長文學尤工詩詞積其自壬子年起至戊子年止（即民國元年起到至三十七年止）所有五十以前製作刪存三百篇末附詞曲數十首合帙成卷題其名曰「行素軒詩集」一日出示於余囑爲序展讀之下欽佩不置近人有謂「詩有止於技之詩也有進於道之詩」（見馮友蘭「明詩」哲學評論第八卷第二期）然則薛君之詩究止於技乎抑或進於道乎余以爲薛君之詩技與道兩者俱備就技論薛君之詩平坦淺易婦孺都解就道論薛君之詩志在濟世行在獨善合言之薛君之詩論其篇數現僅三百不及白香山遺詩篇數什之一（按白香山身後遺詩計共三千八百四十餘首）然論其技及道卻與白香山之詩體頗相接近縱非盡稱創作然亦可謂善於仿古者矣然則薛君之所以自額其軒曰「行素」又題其篇曰「行素軒詩集」自非無故余與薛君交甚久民八相識於南京高師民國廿四五兩年共事於鄂閩民卅四年同渡臺灣迄今尙時相過從不特屢讀其詩並且深識其志故不揣謏陋爰綴數語於此以副雅囑並聊表友誼云爾是爲序。

中華民國卅七年四月十五日

姜琦序於臺北寓邸

149725

題 詩

接席論交三十秋 知君文藻擅風流 淮南賭酒聞高詠 白下題襟記勝遊 海國波濤

春漸老 中莽荆棘莽難收 料應王粲長吟處 千里相思正倚樓

莽莽神州入望新 海天漠漠正愁人 已看構李難歸越 豈有桃源可避秦 烈士徇名

悲戰血 書生知命老風塵 不須更灑思鄉淚 莫理山高草木春

玉山原名  
莫理遜山

歐 陽 蒼

題詞

鷓鴣天

彩筆縱橫李杜才  
宮商斟酌寫幽懷  
非因湖海飄零慣  
爲滿詩囊不肯回  
撚髭斷  
幾剪裁  
點盡鉛丹梨棗災  
一編長把人人手  
詎讓前賢紙貴來

曹

芻

題 曲

【大石青杏子】席帽映蒼顏 十年來歷盡艱難 笑半肩行李無牽

絆 也曾攀蜀棧 久浮湘水 又到臺灣

【歸塞北】鷗影外 纔覺一身閑 得句每饒湖海氣 舊遊難忘小

長干 夢裏雨花山

【么篇】歡不再 此去幾時還 往事追尋惟篋稿 華嚴樓閣指重

彈 薄暮獨憑闌

【尾聲】這萬里江山春何限 不似那蒼狗白雲都幻 從今後神州袖

手看 但祝你高吟少憂患

盧

前

題自南京徵獻樓

## 自序

夫立德立功本聖人之偉業而載歌載詠亦騷客之幽懷建吾淮東寒峻海石謫材無路請纜空負扶笻之志有懷濟世常行汨水之吟英雄當不虛生風鑑或在同調此行素軒詩集所由刻也憶昔童孫穉幼大父鍾憐繞膝歡長含飴樂水深宵課讀十載辛勞廣被延賓遠朋戾止望兒有日百忍備於張公垂訓孔長四知畏於楊子蒙讀鄉塾幼入學堂縣小府中期完業畢淮陰市上春風弔韓王之臺射陽河邊秋月拜陸相之宅篆香寺古頻停會文之車望海樓新屢倒輔仁之屐再入南雍更卒太學成賢街畔五載琢磨孟芳館中兩番砥礪飄零六朝金粉長留天嬌蒼松黯澹七級浮圖依舊長干梵宇秦淮打撈玄武泛舟虎踞聽潮龍蟠掃葉固已廣結懸壇巨壁多識儒林宗師矣其治學也以教育爲主科列國文爲輔系具斐斯太洛之園丁身手精蘇格拉底之產婆技能啓迪全民發展社會本此信念蔚爲壯懷若乃揮毫染翰論道抒情意在筆先理存行裏必欲遵唐襲漢早落下乘須知推陳出新端在卓見又若辭賦之作駢儷之文五韻調和八音朗暢擲地作金石之聲織錦有瓊璣之譽但徐庾體織王楊音靡兩宋骨立有明神離惟長卿堪稱大匠如天游終屬小巫又若風爲詩首情居易先俸色揣聲裁雲鏤月必具溫柔敦厚之旨殊忌伎刻瀆薄之詞三百十九頗多寄託香簾玉溪惟擅才華三唐蘊藉兩宋徑露有明粗疏遜清穠冶正變全不相同源流當可立辨使規撫杜玉玊豆陶李不棄繼墨自運智巧思可過半理難厚非矣又若詞起六朝品高兩宋意內言外不取質實律應腔韻尤貴清空密藻麗情極妍盡態體態詞媚意刻色濃瓣香李氏三王傳燈晏家兩輔蘇辛豪放究非正宗姜吳

婉約的是高手又若曲爲詞餘譜成套式辭尙趣機語貴委曲關馬鄭白雜劇名家拜殺荊劉傳奇傑作振盡  
伶工嗓子牡丹亭徒騁才華繞來劇院櫻頭長生殿雅擅音律燕子箋固爲詞壇妙品桃花扇更屬曲苑異軍  
其優劣自分高下立見矣他若裨官菊部燈謎鼓詞雖屬小技蟲雕亦須大匠斤運總之性靈抒寫無忘矩規  
陶鑄虛無必歸繩墨骸骨迷戀任鬻笑之隨人國粹發揚識任務之在我共邀遊也南臨梅嶺北抵龍堆東登  
臺澎西遊巴蜀窮金頂躡玉山過銅陵登鐵甕濯九水跨六橋泛三湘行八皖訪維揚之瓊花賞樓霞之楓葉  
納涼牯嶺踏雪嶗山廿四橋邊二分明月十三陵外一抹殘陽畫船午入西泠香車晚驅東陳淒涼處士之塚  
鸚鵡洲荒寂冀商婦之舟琵琶亭古聽鼓大明湖畔垂綸小清河邊瑟瑟鼓湘靈峯青江上牛騎柱史氣紫關前  
白帝城高英雄遺恨青芝寺蓮國老閒情浩淼五湖難尋麗影清冷九曲莫聽書聲重到彭城也思戲馬深入  
芒碭未起濟龍丈人峯頭三觀浴日長城窟下兩眺飛沙屢穿石洞之靈頻酌天池之水盡山川之壯麗極宇  
宙之奇觀耳目發皇身心舒展直羅丘竅於胸中走烟雲於腕下矣其服務也身居講席志在樹人珊瑚宏張  
杏壇大啓懸殘絳帳恩臨廿六暑寒坐弊青氈濟濟黨千弟子青藍煥彩桃李盈門固已謁盡棉薄貢獻國家  
矣洎乎開釐蘆溝播遷蜀道重開齊列仙班兩兒競登鬼籙田園盡赤慮舍早黔但瘠心抗敵致力育才矢堅  
蹈海之貞不改陋巷之樂幸也日寇投降同盟勝利三臺光復四海昇平初則破浪乘風宏施教化旋乃移宮  
換羽忝隸官衙壯志彌堅雄圖未已傀儡場中刻偶以戲歌舞席上沐猴而冠煊赫一時銷沈永夜癡人癡夢  
達士達觀值伯玉覺非之後歲丁仲尼知命之當年搜集詩歌刪存三百附錄詞曲顯示一班再生則譬諸種  
種今朝爲善則同於孳孳來日民國三十七年三月二十一日五月初度薛建吾序於臺北之寓廬

目錄

姜序	.....	三
歐陽題詩	.....	三
曹題詞	.....	三
盧題曲	.....	三
自序	.....	三
壬子年	.....	三
飄城八勝錄四	.....	一
癸丑年	.....	一
水邊菊影	.....	二
漁莊	.....	二
甲寅年	.....	二
韓侯釣臺	.....	二
跨下橋	.....	二
漂母祠懷漂母	.....	二
韓侯祠弔韓信	.....	二
乙卯年	.....	二
秋月	.....	三
秋水	.....	三
秋風	.....	三
秋雨	.....	三
丙辰年	.....	三
本校開第一次運動會詩以祝之	.....	三
丁巳年	.....	三
留別在校同學	.....	四
留別劉秉鈞先生	.....	四
蒲劍	.....	四
艾人	.....	五
戊午年	.....	五
和璧山詠菊	.....	五
再疊前韻	.....	六
童子軍模範人物十二詠錄六	.....	六
己未年	.....	六
近事書感	.....	七
留別黃璧山先生	.....	八

庚申年

五月九日有感即次周兄慶光韻……………八

辛酉年

實秋弟以小影見貽賦以贈之……………九

臺城晚眺……………九

壬戌年

金陵雜詠……………九

癸亥年

北湖春泛……………一

臺城春望……………一

踏青詞……………二

春鷗曲……………二

夏日閒居……………三

甲子年

長城放歌……………三

青龍橋瞻仰詹天佑銅像……………三

龍城話別 四首錄三……………三

乙丑年

鎖春園……………三

孝陵春望……………四

造林場植樹……………四

重九鼓樓登高感賦……………四

感懷……………五

丙寅年

九里山……………五

仲春同鐵翹兄登攝山絕頂看作……………五

丁卯年

重游臺城悼進之……………六

揚州五亭橋……………六

戊辰年

送春……………六

金陵懷古五詠……………六

己巳年

病中……………八

訪韶娃宮弔西子……………八

庚午年

秋夜……………二八

辛未年

通鑿道中……………一八

壬申年

舟行有感……………一九

亡室戴氏謝世十年寒假返家特往墓憑弔

爲之懷惻不已……………一九

癸酉年

遊鄂鄒山……………一九

秋暮再渡潞水遊鄂鄒寺山容依舊人事益

非根觸前塵賦此誌感……………二〇

登石子崗……………二〇

傷心重上雨花臺……………二〇

甲戌年

北遊漫興……………二二

乙亥年

潞水吟……………二三

仲秋登琴臺……………二三

行素軒詩集 目錄

丙子年

江行望三山磯……………二五

舟過采石磯……………二五

采石磯弔李太白……………二六

頌堯希魯蘭陔意秋扶霄仲基吉光立生招

飲秦淮河房賦此誌感……………二六

南中師範科畢業服務京寧各校諸生公議

六華春感賦並以勗之……………二六

江行望頭關……………二六

湖口……………二七

姑小山……………二七

武漢四墓詠……………二七

仲秋再登琴臺……………二七

客中生日招知友飲於鄂垣酒舍感賦四首錄三

憶舊流……………二八

龔記大舞臺聆萬春演田七郎……………二八

武漢四樓詠……………二八

黃陂師範農閑教育雜詠 十八首錄七……………二九

題靜疑紀念冊……………三二

丁丑年

登天都峯……………三

贈陳生夢軒……………三

去榕城……………三

戊寅年

長沅流離吟……………三

己卯年

沅陵……………三

辰州鳳凰山……………四

二酉山古藏書洞……………四

二酉山……………四

湘川道上雜詠……………四

庚辰年

歌樂山……………四

歌樂山雲頂寺……………四

山洞……………四

老鷹巖……………四

辛巳年

由北泉登縉雲山……………四

縉雲山……………四

縉雲山觀風亭……………四

獅子峯高蹕門……………四

相思鳥……………四

壬午年

哀人質……………四

不堪客裏又重陽……………四

過劉氏山莊……………四

癸未年

喜克鄭州……………四

聞故鄉三度淪陷……………四

甲申年

代壽張母譚太夫人八旬大慶……………四

鮑母既沒之八年家孫震球年兄追懷先德述行……………四

傲文謹賦七律用詒景仰代作……………四

代壽李丈德炎七十有六和文郎敦靜韻……………〇六  
南中諸生曩曾聚飲都門六華春十年來飽  
經喪亂流寓渝城者計達十數人復讌洞  
庭春感賦……………〇六

乙酉年

悼羅斯福總統……………〇六  
送錢兄信中……………〇六  
去渝赴臺……………〇六  
留別沙仰三兄……………〇六  
代輓周運恭先生……………〇六  
白帝城……………〇六  
出夔門……………〇六  
曉過巫山……………〇六  
登臺……………〇六  
丙戌年  
新竹師範留別同仁……………〇六  
贈吳顯言兄……………〇六

題延平王赤嵌城西望圖……………〇一  
赤嵌樓……………〇一  
弔吳鳳殉難地……………〇一  
阿里山忠王廟……………〇一  
北港義民廟……………〇一  
五妃墓……………〇一  
關子嶺……………〇一  
二訪碧雲寺……………〇一  
火山口……………〇一

丁亥年

乘阿里山火車登山……………〇一  
堀浪湖……………〇一  
平遮那望堀浪湖……………〇一  
十字路望番家……………〇一  
阿里山園墟……………〇一  
阿里山閒行……………〇一  
祝山觀日出……………〇一  
送施屏周院長……………〇一

題趙壽珍君雙紅樓詩集並贈..... 五四

草山櫻花..... 五四

烏來..... 五四

弔太湖明寧靖王墓..... 五四

謁竹瀝明寧靖王廟..... 五五

虎頭埭..... 五五

戊子年

指南宮..... 五五

悼聖雄甘地..... 五五

觀新疆青年歌舞團公演..... 五六

五十述懷..... 五六

增錄詩餘

一翦梅 述懷..... 五七

洞仙歌..... 五七

三姝媚 詠夏柳..... 五八

壽種春..... 五八

雙麗子..... 五八

水調歌頭 春暮遊頤和園..... 六二

金縷曲 送菊軒赴魯西..... 六二

解運環 寄誓流..... 六一

蘇幕遮..... 六一

金縷曲 贈金聲..... 六一

早梅芳 賀江寧板橋小學遷校週年紀念..... 六一

金縷曲 憲兵學校八週年紀念祝詞..... 六二

念奴嬌 欣聞日寇投降喜賦..... 六二

增錄詞餘

金陵懷古..... 六三

弔大明十三陵..... 六四

輓周母楊太夫人..... 六四

拾遺補白

日月潭

阿里山神木

阿里山原生林

和黃鑾山先生

# 行素軒詩集

淮東薛建吾著

壬子年

瓢城八勝錄四

登瀛橋

射水湯湯夕照紅

橫波百尺駕飛虹

我來也作登瀛客

題柱揮毫意氣雄

望海樓

疏櫺四面曉窗開

駭浪驚濤掠岸來

海上神山渺何處

雲中幻出蜃樓臺

陸公祠

誓同宋室共存亡

羞獻降胡表一張

最痛趙孤存不得

長留丞相一祠堂

范公隄

高圩捍海近千年

無數生靈賴保全

如霧如烟三月雨

范公隄上草芊芊

癸丑年

水邊菊影

數枝搖曳碧溪濱

冷艷冰姿迥絕塵

最是西風斜照裏

凌波疑是洗紗人

漁莊

生涯一艇傍垂楊

茅屋臨流野趣長

門外幾聲漁笛起

綠簑青笠話斜陽

水繞孤村月印潭

竹扉倒影綠波涵

獲魚換得烏程酒

醉臥滄江月欲酣

甲寅年

韓侯釣臺

淮水蕭蕭蘆荻秋

得魚換酒傲王侯

臺邊若肯垂綸老

雲夢那教作楚囚

胯下橋

蛟龍失水困平沙

胯下逡巡一市譁

誰識韓侯真大勇

漢王長樂霸王嗟

漂母祠懷漂母

窮途誰復識王孫

巾幘偏施一飯恩

「豈望報乎」忘母訓

未央宮枉泣冤魂

韓侯祠弔韓信

將將輸人善將兵

功成埃下狗當烹

幾時曾結陳緣反

呂雉何知問劇生

## 乙卯年

秋

月

慣從客裏舉杯邀 對影成三慰寂寥 竟夜寒蛩咽古壁 半窗皓魄共良宵 分携千里人何在 寂寞長門怨未消 更向青天把酒問 瓊樓高處可無聊

秋

水

白蘋紅蓼晚蕭蕭 歧路屏營悵瀟橋 江上琵琶傳畫舫 渡頭挑葉罷蘭橈 助時快送滕王閣 失路慵吹伍子箫 浩汗長天共一色 伊人何處黯魂銷

秋

風

風急天高萬木號 無邊黃葉下林皋 孤帆隱約衝波闊 清笛蒼涼逸韻高 夾岸蘆花飛白絮 入簾山色卸朱袍 葦鱸忽動歸歎興 無地理愁讀楚騷

秋

雨

枕玉涼生夜寂寥 何來急點響瀟瀟 驚殘一榻南柯夢 敲破幾株北院蕉 五夜鐘

沉橫旅雁 三更漏斷咽寒蛩 增前葉落知多少 牒有閒愁帶酒澆

丙辰年

本校<sup>蘇省</sup>九中開第一次運動會詩以祝之

神州戰局幾番開 蚤雨蠻風掃地來 天演競爭強食弱 民風萎靡禍潛胎 盟尋白

馬排他族 劫挽紅羊仗異才 玉石待磨金待礪 少年急起莫徘徊

淮徐自昔健兒多 士氣而今看若何 項劍旣成寧待學 樊溝三劃要能過 糾桓大

是干城選 抗墜時間體育歌 我武維揚從此始 他年報國靖鯨波

丁巳年

留別在校同學

數載清淮石友聯 萍蓬離合總前緣 四年共硯情難忍 一旦分襟意惘然 嗜學盼

君成偉器 庸才愧我着先鞭 東勞西燕尋常事 雲樹相思寄一箋

留別劉秉鈞先生

蓬壘追隨近半年 痕留鴻爪證前緣 眼無後進常傷我 座有先生幸執鞭 雨晦風  
瀟商舊學 花朝月夕展新箋 勸公莫抱牛刀憾 作嫁依人總可憐  
廿載徒將負負呼 淮鹽奔走老征途 豐祠自昔瞻韓信 遺迹於今拜秀夫 大抵高  
人能屈節 斷無烈士不捐軀 慚余空負凌雲志 依舊今吾似故吾

蒲

劍

脫卻水雲鄉 當門意興長 臨風舒翠穎 映日耀青芒 邪辟天中節 霞飛五日觴  
會賞飛紫電 魑魅莫猖狂

艾

人

文屈天中節 菖蒲劍欲磨 呈身憑妙手 灼背起沈疴 不待三年蓄 相逢五日多  
中原妖燄熾 爲我掃羣魔

戊午年

和壁山詠菊

豈向羣芳殿後塵 傲霜迥露見天真 籬邊寒重魂離瘦 徑裏秋深色可親 酌酒常

陪陶處士 餐英時有楚騷人 西風戰慣留香晚 寂寞由來不笑貧

再 疊 前 韻

何年墮翅落風塵 獨向霜天見性真 傲骨豈惟陶士契 芳心猶共楚魂親 晚香不  
少憐佳客 傾國翻多愛美人 羞與凡花爭旖旎 金精藏得自安貧

童子軍模範人物十二詠 錄六

盡 忠 汪 躋

報國丈夫事 何期出幼童 執戈安社稷 禦侮事兵戎 海嶽烽烟黑 沙場戰血紅  
成仁汪子願 將相可憐蟲

助 人 郭 震

薄葬原非墨 其如石曼寒 假君四十貫 窆彼兩三棺 幽室千秋閉 高風百代難  
童牙能好義 莫作等閒看

親 愛 王 覽

遺事稽曹魏 千秋感慨生 閱齋無涕弟 如意有慈兄 楚撻分祥杖 鞭笞共覽平

問渠煮豆者 可有友于情

快樂顏回

陋巷安居久 簞瓢未厭貧 道心經史契 義域聖賢親 竹簡饒滋味 茅廬守性真  
一山馨桂滿 博約冠莘莘

勇敢宗慤

拔劍當關立 填膺義憤多 俠心光日月 英氣壯山河 桓武駭強寇 歡欣奏凱歌  
乘風猶有願 萬里破長波

公德薛平

滑上黃河決 使君濬巨川 白波長臥水 綠鷁遠浮天 沃壤成千頃 高隄壯萬年  
至今鄉父老 猶聽頌聲傳

己未年

近事書感

赤縣瘡痍滿目中 鼓鼙遙聽海天東 鯨魚拔浪掀波白 烽火漫空照眼紅 楊議曾

簽辱國約 兵氛又起捲妖風 匹夫元有興亡責 十萬橫磨氣自雄  
神州戰局幾番開 美雨歐風畫角哀 和議本非中國事 折衝纔是外交才 孟明詎  
敢忘殺役 勾踐常懷返越臺 搯吭從今排日貨 會看倭寇請成來

留別黃璧山先生

飄零身世若浮漚 倏忽堰南一載留 聲譽久聞蜚海嶠 文章今始識荊州 花晨月  
夕曾商學 雨晦風瀟易感秋 最是愁懷難遣處 依人常上仲宣樓  
蕭瑟西風柳萬條 半帆秋舫客魂銷 君因離別歌三疊 我愛江山訪六朝 別緒怕  
看紅豆子 鄉心應逐白門潮 從今千里分攜日 惟盼音書慰寂寥

庚申年

五月九日有感卽次周兄慶光韻

壯懷多磊落 傷時殊焦索 五夜不成眠 晨鐘動蘭若 信步訪高僧 高登北極閣  
放眼望扶桑 妖氛起日脚 俯首視中原 英雄猶未作 救國在吾儕 誰得先鞭着

辛酉年

實秋弟以小影見貽賦以贈之

壯士身軀武士裝

瑤林瓊樹貌堂堂

與君共負與邦責

我向文場君戰場

臺城晚眺

秋高天氣爽	日暮上臺城	放眼一遠眺	心神爲之清	石城如虎踞	鍾山若龍蟠
揚子江澎湃	雨花台崢嶸	金陵形勝地	羣山列錦屏	名湖盪城下	中泊釣魚船
楓葉紅于染	炊烟縷縷騰	無何金烏逝	明月漸東升	白雲變黴起	羣山盡隱形
玄武湖如鏡	晶盤濯月星	萬家燦燈火	似與月爭明	漁燈三兩點	閃灼射江汀
忽聞暮鐘響	同泰寺裡鳴	令人發深省	吾因感慨生	昔聞梁武帝	重佛國家輕
捨身凡三度	佛當鑒其誠	奈何侯景逼	荷荷而遂薨	未登極樂國	先傳餓鬼名
報施何太爽	我說佛無靈	世之佞佛者	可以鑒前型		

壬戌年

金陵雜詠

六代繁華眼底無 芳名猶把莫愁呼 果然不管興亡事 千載明湖尙姓盧 (莫愁湖)

金粉飄零劇可哀	鶯花不復滿章臺	青青兩岸扶疎柳	盡是滄桑劫後栽	(秦淮河)
臺中帝子今何在	垂柳蕭條夕照明	千載蕭蕭玄武水	波光如雪撼空城	(臺城)
說法雲光去不同	累纍荒塚惹人哀	紙灰歲歲迷寒食	疑是天花落講臺	(雨花臺)
生死不離寧共穴	風流至此亦堪哀	而今井帶胭脂色	應是芳魂呵護來	(胭脂井)
枉說當年南面尊	榮華賸得一坏存	西風落葉斜陽路	翁仲無言對墓門	(明孝陵)
烏衣巷口柳天斜	王謝風流昔日誇	海上歸來雙燕子	高垣不識別人家	(烏衣巷)
帝子當年此捨身	菩提不解證何因	祇園未演無生法	圓寂卻教爲叛臣	(鷄鳴寺)
鍾山依舊勢嵯峨	王氣金陵似此多	江上羣峰齊拄笏	年年參謁拱煙螺	(紫金山)
匹夫仗劍渡江來	三百餘年帝業開	過眼豪華真石火	朱家宮闕早蒿萊	(明故宮)
巍巍傑閣枕高山	古木寒鴉夕照殷	王氣已知南國盡	好將興廢認煙鬟	(北極閣)
塵世滄桑閱幾回	一番歡樂一番哀	棲霞寺裏多餘燼	應有山僧話劫灰	(棲霞寺)
半村半郭水雲鄉	蘆荻蕭蕭秋興長	獨自陶公亭上望	鍾山如畫澹波光	(玄武湖)
明帝風流曠代無	一枰戰後判贏輸	如今笑指漁樵問	何處高樓尙姓朱	(勝棋樓)
鍾山環抱白雲封	谷口迷離楓葉濃	世外桃源尋不得	隔林遙度一聲鐘	(靈谷寺)
清涼山上幾登攀	差喜風煙隔市關	最是高樓堪愛處	開窻面面看青山	(掃葉樓)
天險當年鎮白門	幾番塵戰陣雲昏	滿山楓葉紅於染	應是英雄碧血痕	(天堡城)

捲地狂瀾汜未休 嗟峨百尺壓中流 恍疑王謝堂前燕 來鎖鯨波不許流（燕子磯）

### 癸亥年

#### 北湖春泛

爲愛昆明勝 扁舟泛夕暉 春晴波欲活 天暖藻初肥 頰鯉翻萍躍 蜻蜓點水飛

梁王城下過 絲柳正依依

#### 臺城春望

春日尋芳同泰寺 梁王城上草芊芊 一年花事迷蝴蝶 千里鄉心逐杜鵑 古道馬

嘶紅杏雨 晴湖棹破綠楊煙 繁華賸有荒臺在 三五兒童放紙鳶

#### 踏青詞

綠女紅男擁道周 長千里上碧如油 尋芳爲愛江南好 鬪草彈箏樂未休

#### 春曉曲

銅壺漏未殘 香閣春愁重 無情恨曉鷄 驚破遼西夢 妾意比朝暾 郎情若霜露

一別已三年 光景等閒度 推窗捲珠簾 鳥鳴花欲吐 何處是天涯 紛紛清明雨

夏日閒居

蕉雨送新涼 鄉園野趣長 柳陰時信步 荷氣沁詩腸  
對酒醒還醉 高歌慨以慷  
一聲漁笛起 門外又斜陽

甲子年

長城放歌

臨洮河上起金墉 沿河傍嶺趨遼東 蜿蜒起伏萬餘里 盤雲跨壑奪天工 昔聞戰  
國燕魏趙 各築高城防胡擾 秦王雄武世難當 四海定一六王掃 海上仙語亡秦  
胡 急遣蒙恬逐匈奴 五百萬軍鎮北塞 再命監軍遣扶蘇 欲爲子孫策萬安 增  
築長城民力殫 哀哀生靈遭塗炭 愁看萬里盡朱殷 金城湯池何磊隍 不道亡秦  
由胡亥 漢高皇帝困白登 木美人把闕氏詒 和親苟安四百年 五胡幾把晉祚改  
漁陽鼙鼓動地來 苟無李郭唐幾殆 沙陀紹唐劉繼漢 北遼西夏難羈絆 朔風凜  
冽五國城 波濤險惡涇山畔 蒙古居然一中原 土木變起王師散 三桂乞得韃靼  
兵 榆關一入版圖換 古事歷歷胡難控 長城雖堅有何用 方今五族慶共和 泱

泱中華大一統 我今高登居庸關 放眼北望淚潸潸 黃沙白草無人迹 羣山糾紛  
雁唳寒 吁嗟長城限華夷 實邊開墾不可遲 北門鎖鑰別有在 團結蒙胞固北陲

### 青龍橋瞻仰詹天佑銅像

巍巍銅像五雲中 京(北)遠車通埽化工 壓倒一般碧眼子 青龍橋上想英風

### 龍城話別 四首錄三

政滅刑輕似水清 使君美譽溢龍城 聲威早懾強梁膽 慈愛尤移士庶情 教育維  
持明治化 僉壬破壞敗經營 鯁生久被滋培惠 報德何年負寸誠 (劉考亭縣長)  
三疊陽關怕展眉 前塵回首不勝悲 欲將樂育英才意 來作磨礪璞玉師 振鐸威  
君艱共濟 濫竽媿我去偏遲 臨歧莫下絲絲淚 風打萍踪會有時 (諸 同 仁)  
俠骨高風迥絕今 偏從濁世得知音 元龍好客常爲樂 阮藉窮途莫漫吟 周密護  
持紓我困 殷勤款待感人深 他年誓作千金報 未許臨歧淚滿襟 (沙 夢 祥)

## 乙丑年

### 鎖 春 園

風信連番到梓園 荼蘼開到欲黃昏 繽紛桃李無顏色 寂寞池塘冷夢痕 惜別欲驅杜宇鳥 留春重設護花幡 爲憐小草迷歸路 全賴東皇雨露恩  
來無踪跡去無痕 買盡金錢枉斷魂 坐待曉鐘憐鳥拙 不知閉戶笑游惰 生憎柳絮正爭路 怕洩春光靜掩門 從此秣陵春色滿 不教零落怨王孫

### 孝陵春望

孝陵依舊枕山阿 有客登臨感逝波 烽火頻頻消王氣 河山黯黯動悲歌 亂紅狼藉春無主 嫩綠迷離恨若何 日暮牛羊成隊出 青青偏只寢宮多  
早無人拜墓門煙 悵望江天一惘然 龍去鼎湖空化鶴 月明華表泣啼鵲 春風得意江南岸 翁仲無言夕照邊 五百年來成寂寞 英雄不作豎兒傳

### 造林場植樹

平疇數頃近城隈 我亦清明植樹來 待到成陰新綠滿 他年都是棟梁材  
中原擾攘亂如絲 大厦難教獨木支 敢廢十年種樹計 會教大匠賞高枝

### 重九鼓樓登高感賦

心緒千般久鬱陶 爲酬佳節強登高 聲淒白雁懷鄉國 劫挽紅羊愧我曹 四載狂

呼淮市酒 重陽獨詠秣陵糕 年來賈誼憂殊甚 況值錢塘倒怒濤  
黃葉西風畫角寒 高樓憑眺客心酸 哀鴻中澤家安在 鐵馬金戈室不完 何日戰  
雲銷海徼 而今烽火滿江干 金陵舊是豪華地 如此山川不忍看

感懷

廿八韶華似電馳 依然負此好雄姿 寧同雞鶩爭微食 且學鷓鴣寄一枝 杜老情  
懷常作客 賈生才調獨傷時 何年遂我騰驥願 驥足中原任駟馳

丙寅年

九里山

九里山前草盡黃 行人猶說舊沙場 范增若解追韓信 那許江山屬漢王

仲春同鐵翹兄登攝山絕頂有作

愛覽栖霞勝 同登第一峯 江流千里壯 山勢萬重隆 禹迹留殘碣 伽藍度遠鐘  
白雲迷巖隄 深壑有潛龍

丁卯年

重遊臺城悼進之

八年未上古臺城 此日重過淚欲吞 六代空留金粉迹 九原莫返少年魂  
明湖浩淼添新色 蔓草迷離沒舊痕 風景不殊人事改 茫茫天道歎寧論

過揚州五亭橋

依舊清溪漾綠漪 五亭橋畔柳絲絲 龍舟一去無消息 不見珠簾十里垂

戊辰年

送春

臘鼓喧闐徹九垓 寒梅先帶好音來 柳舒青眼鶯啼急 桃展朱唇蝶夢回  
微雨微晴花世界 乍明乍暗月樓臺 韶光九十征駒疾 無限離愁鬱不開

金陵懷古五詠

雞鳴埭懷梁武帝

十廟沒長楊 當年此定疆 捨身嗟帝子 誤國咎空王 鷄自鳴高埭 鐘猶出上方

景陽樓上望 烟草兩蒼茫

### 胭脂井弔陳後主

傑閣昔凌霄 繁華一曲消 作君真命薄 入井更魂銷 韻事空前代 風流歇六朝

### 明孝陵謁朱太祖

遺跡認銅駝 興亡一瞬過 應天光日月 赤手統山河 定鼎金湯固 藏弓鐵券磨

### 莫愁湖思徐中山

閒上勝棋樓 江山一覽收 當年經戰伐 此日話風流 終遜鴟夷隱 徒贏水國秋

### 清涼山訪翠微亭

爲愛城西勝 清涼覓翠微 殘碑前代認 蔓草圯亭肥 人物江流盡 烟鬢劫火非

己巳年

病中

客裏偏教二豎侵 小窗短榻日呻吟 多情最是天邊月 伴我淒涼到夜深

訪館娃宮弔西子

復國殲仇巾幗雄 館娃一入霸圖空 功成更逐鴟夷去 煙水蒼茫一冥鴻

庚午年

秋夜

水國驚秋早 洪濤撲枕來 陰霾沈靜月 苦雨挾奔雷 旅雁中宵咽 飛鴻四澤哀  
漫漫長未旦 雲霧幾時開

辛未年

通鹽道中

浩渺天連水 洪波捲地流（本年大水災） 通鹽三百里 風雨滯征舟  
衝波三四日 小泊范隄東 秋月高愈白 漁燈遠不紅 湖零驚落葉 惆悵倚孤篷  
身世無窮感 頻年似轉蓬

## 壬申年

### 舟行有感

水逆風狂浪撲舟 篙師失色奮中流 人瀛較此波濤惡 我獨揚帆向上游

### 亡室戴氏謝世十年寒假返家特往墓憑弔爲之悽惻不已

風湧層雲野色昏 荒原孤塚黯斜曛 不堪重弔埋香處 何日能歸月下魂  
當年小別纔三日 痛賦離鸞返太真 十載風塵猶故我 心期孤負淚盈巾

## 癸酉年

### 遊瑯琊山

爲愛潞陽勝 尋幽到釀泉 高峯雄拔地 古木勢參天 鴻雪留新印 （山有雪鴻洞）

瑯琊了宿緣 蓮宮傳暮鼓 俗慮盡蠲滌

秋暮再渡滁水遊瑯琊寺山容依舊人事益非根觸前塵賦此誌感

偏有瑯琊未了緣 十句兩度此聽禪 鐘聲纔醒癡人夢 好景終憐夕照天 交誼幾曾堅鐵石 人情無奈薄秋煙 胸中磈礧澆難盡 回首前塵倍惘然

### 登石子崗

重陽僧揚子研真步出白下南郊登高石子崗訪高士遺臺弔源兒新塚傷情憂世萬感填膺爰成四律藉銷魂

滿城風雨白門秋 強病登高豁遠眸 倭寇跳梁橫鐵騎 漢軍曳甲裂金甌 遼陽鶴返家何在 江左狼奔禍未休 舉世已無乾淨土 避災臺上倍煎憂  
石子崗頭幾度經 一回登眺一傷形 鵬程擬作雲天翥 鯉化空聞水浪腥 滄海樓船人奮發 風塵書劍我飄零 匹夫共有興亡責 四野哀鴻不忍聽  
風打萍踪此地過 滿腔幽怨付悲歌 情懷似水深尤厚 意氣如山卓不磨 漠漠名場知遇少 滔滔人海負恩多 傷心怕記從前事 辜負丹忱擲逝波  
荒塚長依鳥道邊 墓門三過益悽然(源兒於三月十九日夭於京寓靈葬崗下) 招魂異地哀今日

避禍名山痛昨年（源兒隨余到京僅去年九月今日來崗登高一次其餘名勝均以人事因循未往詎知曾不六月此卽其埋骨地耶嗚呼傷已）  
草草短綠剛兩載 繇繇永恨竟終天 胸中別有難抒意 淚

灑西風哭逝川

### 傷心重上雨花臺

源兒天亡倏經九月夏曆冬至節余出南郭揮淚墳頭時則夕照淒涼寒鴉歷亂四圍群塚紙灰飛揚而源兒則孤塚荒涼冢山不見因之舊恨紛勾新愁難遣狂歌當哭痛比西河達觀忘情慚非太上

傷心重上雨花臺

風景依然眼倦開

記得去年重九日

掣兒曾此避災來

舊恨填膺萬念灰

傷心重上雨花臺

如何一病纔旬日

異地長留土一坯

生自紫琅埋白下

墳頭憑弔淚如瀉

傷心重上雨花臺

歷亂寒鴉啼啞啞

曇花一現劇堪哀

荒塚淒涼沒草萊

地下愛兒呼不起

傷心重上雨花臺

## 甲戌年

北遊漫興

雲龍山

雲龍山色鬱蒼蒼

廢壘依稀古戰場

此日中原正多難

龍蛇深壑莫潛藏

范

增

墓

高塚荒涼黯落暉

傷心霸上願全違

沐猴悔不抽身早

何日南巢化鶴歸

賢子原難與共謀

鴻門偏教誤鴻籌

千秋我過彭城道

也爲先生涕泗流

項王

戲馬臺

揚鞭慷慨縱烏騅

戲馬中原立帝基

我上高臺慕神武

大王畢竟是男兒

霸

王

樓

高樓雄傑俯黃流

伯業銷沈跡尙留

蓋世聲威誰匹敵

英雄兒女共千秋

蘇

姑

墓

駭浪狂濤撲郡城

小姑慷慨獨捐生

至今人到埋香處

憑弔芳魂感不勝

銅

蕭

道

中

小別龍城逾九春

重來風物十分新

青青夾道長條柳

似逐故人展笑顰

板橋站

漠漠荒原遍草萊

柴扉三五未全開

小橋殘板留何處

沒落農村劇可哀

張八嶺迤北稠樓如林感而賦此

一片稠樓入望來

村村自衛築高臺

驚心群盜如毛盛

安得英雄靖九垓

再至龍城訪舊日從遊弟子自中清廉等均因事到蕭不期而遇至爲快慰

一別十年久

龍城又著鞭

相逢倍喜訝

益信有前緣

乙亥年

灘水吟

謁張長白先生墓

佳城鬱鬱沒蒿萊

斷碣摩挲意倍衰

遍唱白翎移重器

長懸絳帳老奇才

明王徵

急辭三詔

處士星高照九垓

桃李可堪零落盡

曠曠斜日下孤槐

登故王臺

東風草綠故王臺

六合蒼茫眼倦開

往日英雄傷不作

讓他賢子詡奇才

清明同天緯跨濠登萬松山賞李花

拾翠郊坳越淺濠

萬松山下聽松濤

鄉愁別恨都湔盡

沁肺清心勝雪桃

春過岱北花開早

綠滿城西我到遲

深谷幽姿如有待

殘紅猶傍最高枝

拂石崖邊坐下風

芳香陣陣日融融

南山陡地鳴天籟

花雨繽紛一片紅

紫陌家家掃墓門

聲聲野哭慘乾坤

天涯我誦招魂賦

襟上斑斑濕淚痕

客中初度有懷

四首錄二

土山同訪興偏豪

野店烹茶勝濁醪

一事歸途應記取

漫天風雨濕征袍

水榭燈紅倍暢懷

嘉賓濟濟譙秦淮

風流轉眼皆雲散

借北江南各一涯

元宵有懷（周村）

瓊花火樹燦元宵

沸耳笙歌破寂寥

最是離愁澆不得

板橋南望倍魂銷

津浦車中眺微山湖

大浸連天遠樹微

數帆破浪疾如飛

北人也駛船如馬

不讓吳兒獨擅威

### 鄒青道中風捲黃沙瀟漫天地

鄒平三月畫飛沙

瀟漫渾難辨邇遐

風過幾聲聞犬吠

始知路側有人家

### 送天緯赴魯西

小別石城七八春

天涯聚首倍情親

經綸空負常憐我

造化無情慣弄人

兩月方

欣傾肺腑

一朝忽悵走風塵

他年若翦西窗燭

聽話成功事業新

### 仲秋登琴臺

一角荒臺漢水頭

知音自古恨難求

我來也自憐同病

不爲兪君淚始流

### 丙子年

#### 江行望三山磯

萬里長江筆一枝

三山排列筆床奇

興來飽蘸天池墨

寫出人間絕妙辭

#### 舟過采石磯

雄礮激浪作雷鳴

鎮鑰東南控玉京

三戰功成標武烈

舟人猶自說開平

### 采石磯弔李太白

蜀道崎嶇不算難

世途荊棘實心寒

奇才自古天人妬

應與靈均一例看

頌堯希魯蘭陔意秋扶霄仲基吉光立生招飲秦淮河房賦  
此誌感

不堪回首憶京門

恩怨千般嬾細論

落井何曾偏下石

苦寒已久獨噓溫

故人義

氣薄霄漢

遊子情懷感夢魂

此日客窻傾別悚

離愁澆盡罄三尊

南中師範科畢業服務京寧各校諸生公譙六華春感賦並  
以勗之

天際婆娑舞六華

秦淮河畔駐征車

經年小別離魂黯

滿室生春笑語譁

師弟因

緣同骨肉

文章意境喻烟霞

相期共盡匹夫責

作育人材報國家

### 江行望頭關

一帶垂楊繞岸栽

依稀茅屋認江隈

難忘酷暑祁寒日

曾爲儲才幾度來

湖 口

江到鄱陽石壁開

巍巍礮壘扼山隈

何時電掣施神武

掃盡夷帆不許來

小 姑 山

亭亭獨立讀江津

仙子凌波不染塵

一任風狂兼浪惡

千秋長葆玉精神

武 漢 四 墓 詠

逐鹿中原志未償

英雄成敗亦尋常

朱明社稷無錐地

坏土千秋屬大王（大漢王

陳友諒墓）

義方教子還鹽鮓

廣被延賓感母賢

日暮鳳凰山下過

敬持新筍奠重泉（孟母墓）

指囷贈友情何厚

拒賊連劉願總違

想到仲謀臣魏日

墓前憑弔淚霑衣（魯肅墓）

一賦曾驚黃祖目

三搗早奪阿瞞魂

權姦入眼如無物

正氣長留處士壩（關衡墓）

仲 秋 再 登 琴 臺

爲尋高士躡

兩度躡琴臺

湖水寒猶冽

山花鬱不開

人稀喧燕雀

徑冷長蒿萊

何處求同調

臨風萬感來

客中生日招知友飲於鄂垣酒舍感賦 四首錄三

浮生三十九年非 一事無成願總違 馬帳空消佳歲月 爲人猶作嫁時衣  
龍性由來未可馴 豈教淺水困絲綸 孤行休管譏凡俗 絕世英雄自有真  
人海茫茫有涸鱗 欲憑慧眼識風塵 漢臬結客傾肝膽 古道何妨獨照人

憶 誓 流

江南草長綠何如 襄漢鶯花總不殊 偏忘武昌魚味美 離魂常自繞京蕪

鑫記大舞臺聆萬春演田七郎

義氣淪亡怕再論 幾人勿頸解酬恩 滔滔舉世皆涼德 我感田郎淚欲吞

武漢四樓詠

奧略樓頭眼倦開 蠻風蠻雨逼人來 南皮老去黃陂逝 莽莽神州幾霸才（奧略樓）  
多少興亡付逝流 磯頭無自覓遺樓 仙踪奇蹟都銷盡 何事名場擾不休（黃鶴樓）  
流連文酒興偏幽 風月無邊暢夜遊 佳話留傳懷太尉 不堪惆悵過南樓（南樓）  
湧地層樓峙武昌 襄江一縷藐三湘 樓頭多少風和雨 安得英雄靖八荒（雄楚樓）

黃麓師範農閒教育雜詠

十八首錄七

東管壯訓

粟湖水落沙灘盡露東管壯丁即在灘上操練始作兵操繼演國技身手敏捷動作一律時朝曦初上照水綉襟隄  
上炊烟四起尤有烟雲繚繞之概教練爲部生臨頤口令正確聲音洪亮尤足震撼湖濱清晨之沈寂

十里湖灘練壯丁

兵操國術習攻勤

他年禦侮殲頑敵

青史高標管氏軍

鄭村早讀

民校設於鄭氏宗祠周生時所註其事某日大風雨天猶未曉學童即叩門入學其攻讀之勤爲之欣慰不置

風雨鷄鳴夜色昏

學童三五叩祠門

縱然驚我華胥夢

恰喜書聲徹鄉村

張勝晚歌

馬黃村距張勝五村凡二里許某夜夜前往方過寺門口即聞歌聲嘹亮近前諦視則玉樹余生紳屨盛生方指揮民

校兒童在廣場操練時朔風初歇萬籟俱沈涼月在大歌聲沸地恍疑天上人間也

行列縱橫步伐靈

歌聲嘹亮入青冥

珠喉畢竟勝天籟

驚動嫦娥側耳聽

賀鐵書聲

賀鐵關位於長臨河西北相距約十里地甚貧瘠住戶達百餘家周生時昭桂生紹丹均試教其地二生且兼辦小張村張宗三村二民校是村雖有私塾二所收學生尙不足五十人失學至衆民校開辦以後學童踴躍入校書聲遠聽爲之怡然

水遠山遙路幾重

柴扉隱約柳陰中

行人笑聽書聲說

此是黃師教育功

### 褚村女學

大小褚村位於黃山之北地僻民闕田瘠山重鄉人生活頗苦幾不知讀書爲何事本校特於是地創辦民校又承當地物望褚謙能先生之熱心贊助因之校務頗爲發展日校有兒童兩班夜校有婦女一班某晚九時由郭家疔前往見婦女班正上夜課實到三十四人幼者十五六齡長達三十許嗣推代表堅請予訓話遂以機會難得求學宜勤勸學宜衆語點易之散學後數人共提一燈四散回家如明星之紛落流螢之亂飛真奇觀也

燈火輝煌燦講堂

褚村婦女夜攻忙

幾聲散學銅鈴響

絕似明星落四方

### 崇程新學

棠梨樹程村東去炯燭十餘里地位太僻未派教生而上李村民校教生汪西富熱心教學頗爲程村父老信仰屢乞汪生每日分出數小時至其村施教汪生遂秉承第十分區指導員鄧慕湯先生之命逐日派上李民校小先生四人分上下午輪往教學汪生逐日亦一度往查予各小先生以指導是校學生竟達六十餘人益見村民嚮學之懇懇矣小先生制行之未久各地多有採用本校施教區之行小先生制者以六家畝特約董正學校之辦理爲最

完善小先生數目達七十餘人所教學業亦逾千名然僅日擇二小時分派小先生至各村施教尚無有用小先生  
辦理整個小學者棠梨樹程村則開生面洵爲中國義務教育史上放一異彩慕湯先生別名是校曰「小先生  
學校 蓋紀實也

別開生面數棠程

兩兩兒童掃學旨

教史又開新紀錄

校名特號小先生

### 校工夜班

交通隊員七人日間雖分往各處輸送文件書報晚間則無事可做亦非利用時間之遺因又組織校工夜班全體  
工友強迫入學每日下午七至八時爲其讀書時間不得另治他事即令七幼生主辦工作頗不憚意而諸工友幸  
勤終日燈下踴躍讀書其造就亦大也

終日全無稍暇時

卻圍燈下誦文詞

莫驚施教先生小

此是光知覺後知

### 題靜疑紀念冊

(二十五年冬)

塞上烽高畫角哀 倭氛滾滾逼人來 平戎自是男兒事 直搗扶桑盼將才  
滿冊琳琅絕妙詞 或抒偉抱或欽遲 靜疑莫作尋常看 要展雄才慰故知  
普施教育拯中華 訓練農民衛國家 兩月南巢同努力 神州會放自由花

丁丑年

行業詩集

登天都峯

石磴千盤繞峻巒  
百尋鐵練掛雲端  
懸崖峭壁勞攀躋  
絕頂凝眸宇宙寬  
煙霧迷濛足底生  
山風深壑作雷鳴  
任他翻覆成雲雨  
我獨憑虛自在行

贈陳生夢軒

慧質靈心迥絕倫  
每從慧處見情真  
元龍別具雄豪氣  
人海蒼茫一錦鱗

去榕城

榕城六月駐征車  
羈客登樓感歲華  
海傲三山明月皎  
江隈一塔夕陽斜  
者番訪勝留鴻印  
幾度澆愁醉酒家  
一事無成猶故我  
劇憐潦倒滯天涯  
作嫁依人總可哀  
他鄉王粲念全灰  
塗泥淺水降龍性  
峻阪鹽車困驥材  
舉世已教鳴瓦釜  
斯文只合老蒿萊  
未蕪田圃重闡老  
且自長歌歸去來

戊寅年

長沅流離吟

長沙大火

誰見倭兵已壓邊 庸奴禍國非瀾天 謠言那許偏輕信 焦土如何竟誤詮 百世精  
華灰赤骸 千秋冤鬼咽黃泉 巨凶縱棄長沙市 元氣疇時始復前

### 由湘垣步行至易家灣

湘垣火發二小時情勢益惡與煥文等步往湘潭途中逃難軍民爭先恐後擁擠異常同伴均相失路側居民逃  
避一空終日未得飲食夜深始抵易家灣

無端烈焰熾長沙 萬衆倉皇散亂鴉 百里長途絕烟火 自憐何事走天涯

### 易家灣

易家灣爲粵漢鐵路及長衡公路並經之處向頗繁盛近因軍事影響人民大部遷徙旅舍全告客滿各民房無論  
有無家主均爲過境部隊傷兵難民等借住予到鑼斷運漏覺住處不得遂至火車站暫歇午夜二時復步月至市  
外之民家其主正料理雜物遷徙屋中已宿滿傷病兵予與商量之後暫在是屋小睡

望門投止談何易 逐戶商量宿亦艱 同是異鄉顛沛客 夜深猶話易家灣

### 湘潭感賦

由易家灣至湘潭陸程僅三十里在路因值空襲(後聞易家灣已襲)延誤頗久至潭亟欲進食不意所有食館商  
店均停業迨暮行至火車站始於難民臨時售飯處一果枵腹

風聲鶴唳徒驚擾 遷徙紛紜亦太愁 十里商場都閉戶 不堪冷落說湘潭

湘 鄉

湘路路極極修築(州)藍(田)段已正式通車予擬赴湘鄉遂登車時車廂車頂均坐有傷病員兵普通乘客無法可上是車停站兩日仍無西開消息傷兵大譁尋站長理論而站長竟已避去遂生傷兵開鎗情事勢異常嚴重路局不得已急令開車予遂擠立於車頭之火爐邊始得附車西行中途火爐發生障礙隨盡去熾火另裝新煤生火九十里短途歷四小時始到城外民房無不客滿酒入城尋覓旅舍費時又一時半始獲一椽之寄次早到街巡視冷落異常而搬運家具者絡繹於路及閱縣府告示知因軍事緊急限居民於二日內離城以致有此現象殊可怪也

未聽宏謀定後方

卻看離境示煌煌

祇因三日長沙火

驚亂湘鄉縣宰腸

湘 寶 道 士

湘鄉寶慶相去二百有七十里老龍嶺一帶地勢絕險兩山夾峙一徑通行山路陡峻車行特慢土匪即懸險恣意掠奪即湖南省保安隊經過亦爲之傷數人器械多枝其他搶劫之事不勝枚舉車行至此咸有成心

養患何人禍始胎

荏苒遍地劇堪哀

殺人越貨尋常事

清掃征途盼將才

寶 慶

重鎮古昭陵

桂黔外戶庭

城隨山起伏

地繫世危寧

資邵雙流水

武新(寶慶南)

界新寧西兩界武岡西北及北界新化均山嶺重疊如一帶屏藩三曲屏民情習驃悍教化賴綸經

祭旗坡

山陵起伏地形雄

當日桓侯立戰功

千載蒼茫斜照裏

祭旗坡上想英風

落箭門

桓侯神武世難當

虎臂雕弓獨挽強

落箭門前遺迹在

至今姓字震蠻荒

桃花洞

桃花古洞假耶真

傳說當年曾避秦

鷄犬猶聞人事改

不堪惆悵覓前津

寶慶東郊佛塔

浮圖七級邵江濱

雄峙東山滿蘚紋

多少興亡都閱盡

千秋長自對斜曛

寶慶雙清亭

雙清亭上坐

容與自翛然

樹密藏山色

江寬鼻渚烟

眼底波光燦

如登鏡裏天

樹密藏山色

江寬鼻渚烟

奇花紅馥馥

異草碧芊芊

寶慶青龍橋

寶慶東臨邵水往來全恃舟楫至爲不便曩年某軍駐邵於渡口設櫃過者人投銅幣一枚閱數年積錢數十萬鳩工築橋長約三十餘丈寬亦三丈許入行道與車道分別井然四噸載重汽車暢行無阻利便交通不淺

滔滔邵水臥長虹

車水馬龍任暢通

利濟行人資合力

橋頭小竚想豐功

宿釀溪

打槩資江上

黃昏泊釀溪

水枯柳岸峭

民困茹簷低

野犬迎人吠

寒鴉繞樹啼

惱他茅店裏

好夢破晨鷄

叢樹灘

灘在寶慶東北爲資水中最大且最險之灘終年有盜匪盤據屢剿不清行舟過此咸有成心

石筍嶙峋水底栽

狂濤倒瀉若奔雷

岸頭伏莽尤猖獗

出得山河（山河長凡百二

十里叢樹灘爲其進口處）笑口開

山河

邵陽至新化之中途自叢樹灘起至筱溪止長凡百有二十里兩山夾峙資水中流勢甚險要土人名之曰山河  
一水中流浪有聲  
千巖夾峙勢崢嶸  
扁舟半日如奔馬  
已過山河百里程

宿筱溪

又向荒邨對月明

終宵輾轉夢難成

鄉愁客思都無賴

數盡寒籌到五更

是夜迄不能眠自亦不知何故兩月後在沅陵接得家報始悉 祖父竟於是夕無疾仙逝余爲道途所阻不克奔喪風木之悲益無涯淚傷哉

### 早發筱溪

如雲如雨曉烟生

咫尺模糊望不明

浩汗水天成一色

恍疑銀海任舟行

### 白溪

山村如畫峙江東

高下隨山建築工

民自辛勤俗亦儉

機聲夜半一燈紅

### 新烟途中觀湘黔路施工有感

鑿山墮塹險工長

廿萬民夫夙夜忙

督辦群公須記取

慎防資敵起黔疆（是路

須由黔境向東展築固利後方運輸且免資敵之患）

### 分水坳匪警 四首錄二

由煙溪往溇浦在馬山中須行三十五里至分水坳出口始入溇境分水坳久爲土匪所盤據出沒無常十一月底勢益猖獗旅客皆裹足不前群在烟溪暫住待結成大隊再行登程十二月六日余亦隨衆前進時有某師某營部隊先導某後方醫院傷病員兵五六百人繼之另某師某隊居中一般旅客殿後而驕夫挑夫等分佈前後總共約

三千餘人某師某營排長及其女眷乘馬居先至分水壩時某排長竟爲土匪所傷而女眷馬匹新購衣料等均爲匪所劫去某師遂布陣接火匪懼十餘人分佈兩山上居高臨下本佔優勢但某師有輕礮關槍數挺步槍六十餘枝火力較大射程亦遠另某隊亦有手榴彈數十枚一部在路猛射一部登山搜索匪乃逸去由壩過來小販甚多亦均言親見匪遁但其部隊絕不敢進轉回十餘里向民家寄宿所有旅客無奈全部退回烟溪往返七十餘里山路崎嶇深夜始達莫不切齒

迢迢烟湫道

莽莽萬重山

到處萑苻蔓

驚心客路艱

國家養武士

旨在寄干城

遇盜猶喪膽

如何卻敵兵

馬

轡

市

倚山臨水一烟村

幾百人家寂不喧

地僻民閒忘歲月

寒鴉噪罷近黃昏

馬

路

口

千巖萬壑裏

殘破一山村

伏莽何猖獗

民生詎忍論

南

安

南安橋上坐

溪水響溼溼

濃樹明猶晦

微風靜亦嘈

山遙連武嶽

(武陵山脈在其

西北衡嶽山脈在其東南)

地邇判安桃(橋左爲安化縣境橋右爲桃源縣境)

幾戶人家小

安閒不

解勞

叢山坳

西尋三渡水 去去入山深 怪鳥迎人啄 寒鴉向客侵 崖高驚險峻 木古感蕭森  
谷口經過久 方寬戒備心

大水田

阡陌縱橫大水田 柴扉三五鎖寒煙 月明萬壑渾如晝 別是桃園一洞天（地屬桃園縣）

三渡水

滔滔丁字水 衝要扼黔湘 守護須嚴密 慎毋忘國防

己卯年

沅陵

水繞山環地勢雄 川黔鎖鑰控湘中 勤勞不染時髦習 儉樸猶存太古風 春到壺頭（沅屬東鄉地名爲馬伏波殉國處）羣樹綠 日移草尾（沅屬西鄉黃草尾在沅江北岸）滿江紅 此真世外桃源境 休使漁郎一棹通

辰州鳳凰山

買棹沅江澗 高登古鳳凰 披襟風習習 蔽日樹蒼蒼  
遠水通黔蜀 遙峯接澧常  
五溪此勝境 千古壯辰陽

二酉山古藏書洞

如何便欲愚黔首 羸政當年計太疎  
古洞蠻荒薜壁裏 猶藏未火聖人書

二酉山

欲盡辰陽勝 來登二酉山 放歌千嶂響 揮涕萬方艱  
遠水迷雙練 層巒壯百蠻  
神州此淨土 莫再染朱殷

湘川道上雜詠

去辰州

辰陽五月息吟鞍 王粲情懷莫自寬 教養黎氓辜抱負 消磨歲月愧偷安 折腰迎  
合寧無恥 長鋏歸來未慣彈 此日行都投策去 欲憑棉薄挽狂瀾

車渡沅江

懸崖百尺落飛虹

沅水滔滔掠岸雄

三噸輪車橫渡穩

益知人巧勝天工

澗

溪

千門冷落簇瀟溪

臨水荒城雉堞低

古樸民風安樂地

粉榆密處午鷄啼

所

里

房屋參差一望新

五溪深處聚苗民

提高文化培元氣

大任原非屬異人

矮

寨

曲折低昂路九旋

長車高陟萬山巔

巉巖絕壑驚天險

管教倭兒葬墓田

茶

洞

行盡湘西路

山村酉水湄

川黔三省界

乾永一長城

古洞遺痕沒

新茶活火烹

民強勸教訓

報國翦鯢鯨

秀

山

民醇俗厚古相近

水秀山明畫不如

偏是邊荒有異境

嘉名無媿小成都

秀山鳳凰山

鳳凰山色鬱蒼蒼

蔽日遮天樹萬章

絕頂披襟聊小坐

征塵滌盡更清涼

西

陽

萬壘重山抱酉陽

民貧地瘠忒荒涼

綠林豪客多如鱗

文物何堪憶李唐

黔

江

森嚴碉堡峭巖巔

鎖鑰西南控鄂川

斗大孤城斜照裏

聲聲畫角破寒烟

黔江觀音崖

策杖深山路幾程

蒼崖鮮壁入眸清

四圍屏障千峯合

萬里雲天一塔擎

洞口涼

生風習習

溪頭漲起響砵砵

危樓更上憑欄久

好鳥奇花總暢情

郁

山

鎮

長車直下萬峯巔

郁鎮喧闐郁水邊

江上木船多似鱗

交通樞紐控東川

秀

彭

道上

萬壑千巖足底看

風馳電掣入雲端

青蓮偏有登天歎

蜀道吾行不覺難

彭

水

蕉葉山城依峻阪

郁烏兩水日湯湯

山童地瘠民強悍

教養兼施未可忘

江

口

三江渡口浪滔滔

夾岸人家倚壁高

四面青山羅几案

泥人村釀醉醪

江口弔長孫侍郎墓

鬱鬱佳城倚夕陽

尊榮絕不繫椒房

武功文治隆貞觀

千載口碑姓氏香

謀國忠貞慮患周

竟教垂老謫黔州(彭水古爲黔州)

幾曾謀叛冤投纆 長使英雄淚不收

巷

口

山莊錦簇傍烏江

層壘樓房幾面窻

市闌戶殷民逸樂

動人村戲聽川腔

羊

角磯

五里長灘亂石橫

狂流倒注迅雷鳴

扁舟一葉從天下

穩渡銀河駭浪平

白

馬村

長街半里列山坳

古木摩空竹影交

多少村氓鬪葉子

卻將歲月等閒拋

北

塘溪

北溟溪口黑雲橫

大雨傾盆霹靂驚

澈夜濤聲喧枕畔

一鈎殘月照天明

涪

陵

風狂雨驟黯涪州

斗大山城壓亂流

石級千層登欲盡

市容水色眼中收

抵

渝州

辰陽別後到渝城

聽澈烏岷逝水聲

行盡千巖共萬壑

兩千里路罷長征

庚辰年

歌樂山

山林幽邃鬱蒼烟

異草奇花滿地妍

何處二郎曾駐節

不聞清樂奏鈞天

歌樂山雲頂寺

高登雲頂寺

廟古不知年

靄靄烟生壑

芊芊草接天

鳥喧忘避弋

人寂學逃禪

樹隙微風過

鐘聲空谷傳

山

洞

車聲轆轤陟山岡

大洞深深百尺長

鬼斧神工奪造化

巉巖絕壑若康莊

老鷹巖

摩天蒼莽老鷹巖 古木森森擁碧巖  
上經過) 萬峯都在足邊嵌

路繞三環橋一線(巖有跨線橋汽車須穿橋孔再由橋

辛巳年

由北泉登縉雲山

十里山程接梵宮

摩天老樹鬱葱葱

樵歌雀噪幽懷暢

流水禪鐘俗慮空

縉雲山

劫火三巴冷 猶存古道藏 九烟迷巖巖

萬綠織清涼

呵護勞鷄嶙(山有雞嶙二神塔)

防閑遠虎狼(各界避難實居者甚多)

洛陽橋上坐

梅放滿園芳

縉雲山觀峯亭

小坐危亭豁望眸

九峯羅列最清幽

不殊風景山河異

幾輩登臨泣楚囚

獅子峯高踞門

森嚴石堡踞峯顛

形勢險雄建築堅

當日鄉民此避難

不堪四海又烽烟

相思鳥

相思竹裏相思鳥 食宿飛鳴解唱隨 不避繳增生死共 媿他世上薄情兒

壬午年

哀人質

一倉就戮白人誅 「納粹」兇殘亘古無 瓜蔓抄猶過十族 豆萁煎竟及同株 無辜人質膏塗地 有恨俘囚目側途 寄語順民須奮起 自由爭取滅強徒

不堪客裏又重陽

不堪客裏又重陽 璧邑登高意倍傷 峽外風雲迷望眼 國仇家恨兩難忘 糜爛神州虜餓張 不堪客裏又重陽 何時直搗扶桑島 生繫昭和小寇皇 拜別重闌五寒燠 傷心墓門黃宿草 不堪客裏又重陽 地老天荒恨不了 空懷報國負文章 祇合名山一卷藏 廿載天涯留爪印 不堪客裏又重陽

過劉氏山莊 (銅梁小坡門人劉影書宅)

參天古柏滴翠 照眼天桃飛霞 冉冉斜陽磴道 潺潺流水人家

門對青山萬笏

院藏綠竹千竿

慣聽悠揚牧笛

何來不速儒冠

茅屋盛陳鷄酒

瓜棚閒話桑麻

東山旭日初上

西閣明蟾猶斜

陶母典釵待士

陳公設榻延賓

我是逢源漁子

君真避世秦人

## 癸未年

### 喜克鄭州

捷報傳聞克鄭州

陝川屏障扼黃流

南征指日澄江漢

北伐崇朝復冀幽

光復山

河新戰績奠安社稷老廷謨

卻欣勝利非遙遠

會見降幡出石頭

### 聞故鄉三度淪陷

血雨腥風宇宙昏

傷心焦土憶鄉園

金戈鐵馬家何在

斷竈殘垣室不存

蝸角三

番胡騎蹕彈丸五度陣雲屯

國仇不報非男子

誓搗扶桑戮海豚

## 甲申年

### 代壽張母譚太夫人八旬大慶

皖公山下茂萱花

百忍堂前舞袖斜

教子早欽賢母孟

稱觴今慶壽姑麻

八旬眼

鮑關山月 十載心馳瀚海沙 只爲籌邊歸未得 佳兒塞上祝年遐

鮑母旣沒之八年冢孫震球年兄追懷先德述行徵文謹賦  
七律用誌景仰代作

六十年來歲月催 相夫教子力全灰 艱難復立昌隆業 逸樂還防凍餒媒 短日報

劉傷李密 遲年衣錦泣袁枚 實言戒惑多全活 坊表崔巍蜀水（水名源出萍鄉滄經萬載

下流合贛江）隈

代壽李丈德炎七十有六和文郎敦靜韻

湘水巴山醉笑同 精神矍鑠老猶雄 卅年作宦之江浪 五載投荒大漠風 出岫無  
心隆杖國 成仁有子重平戎 詩清體健知天相 會祝人間百歲翁

南中諸生曩會聚飲都門六華春十年來鮑經喪亂流寓渝城  
者計達十數人復讌洞庭春感賦

六華春後洞庭春 過眼駒光又一旬 低酌秦淮慵折柳 傾談字水悵思純 漫嗟亂  
世文章賤 卻喜書生道義真 此日巴山堅後約 白門相與洗征塵

乙酉年

悼羅斯福總統

噩耗無端播八荒 環球齊悼失元良  
白宮四領無前例 紅海五超有主張  
盟國同聯全世界 憲章新訂大西洋  
羣兇尙未輸降表 誰起英雄靖萬方

送錢兄信中

桃之花後久華源 十四年來兩斷魂  
梅垞探花春有伴 巴山聽雨夢無痕  
者番聚散渾如醉 如此悲歡未易言  
恰似雙江東逝水 流將離恨出夔門

去渝赴臺

六載渝州泣路歧 乘桴只爲不逢時  
欲憑濯叟回春手 海上全開桃李枝

留別沙仰三兄

騷人絕藝畫書詩 名士閒情烟酒基  
卻喜年來共案牘 渝城深悔識君遲

代輓周運恭先生（幼門）

神州騫地捲狂瀾 烽火宵明武勝關  
誰掃妖氛紓國難 獨憑正氣濟時艱  
誓投東

海丹忱烈 痛哭西臺血淚斑 日莫火門山畔望 白虹直貫斗牛間

白帝城

我來自帝拜英雄 廟貌巍峩夕照紅 舊業未能恢洛下 大軍先已敗江東 弟昆恩  
厚甘同命 魚水情深誓鞠躬 中道崩殂辜偉抱 千秋遺恨永安宮

出夔門

江到夔門石壁開 驚濤駭浪激奔雷 哀猿也解還都樂 不聽啼聲兩岸來

曉過巫山

短棹飛過灩澦堆 巫峯十二曉粧開 陽臺偏少雲和雨 誰道朝朝暮暮來

登臺

回天有力不嫌遲 五十年來一展眉 故土仍遵唐甲子 遺民重睹漢官儀 撫宣殘  
子資仁政 教育黎氓賴大師 爲效文翁樹偉業 乘桴深喜正逢時

丙戌年

新竹師範留別同仁

一曲何時君再來（翰歌）  
憶前颯颯雨風哀（暴風雨）  
酒闌雲散升華月（壽）  
又見光明照九垓

### 贈吳願言兄

南雍何幸列同年  
風雨連牀快砥研  
廿載重逢鯤島上  
相看垂髫只青氈

### 題延平王赤嵌城西望圖

赤嵌西望望京華  
破碎河山淚似麻  
庸主宵宵迷燕子  
詞臣日日醉桃花  
長江那許天成塹  
緬甸何能寓作家  
孤島獨留明正朔  
田橫忠烈詎堪誇

### 赤嵌樓

欲憑孤島騁良圖  
三百年前戰伐餘  
曠代功勳懷國姓  
赤嵌樓上讀降書

### 弔吳鳳殉難地

蕃性兇頑未易馴  
至誠感格誓成仁  
山坡一片甘藍菜  
歲歲朝朝奠義民

### 阿里山忠王廟

廟貌巍巍四度新  
單刀匹馬祀明神  
恩深義厚充天地  
千載兇蕃作化民

### 北港義民廟

無端蛾賊犯粉榆

幸賴男兒抵死驅

廟食也留黃犬塚（賊犯北港爲黃犬所覺狂吠不已義

民紛逐寇寇忿極燈大路側鄉人葬於廟殿後

千秋媿煞苟生奴

### 五 妃 墓

驚報澎湖敗

鄭家降表呈

王堅殉社稷

妾願逐狐驎

樂效虞姬死

羞同息媼生

女貞青馥馥

終古護佳城

### 關 子 嶺

驅車關子嶺

斜日正曛曛

夾路迷紅葉

連峯亂白雲

鳥鳴聲婉轉

湯沸氣氤氳

樓閣懸天半

潺湲枕上聞

### 二 訪 碧 雲 寺

爲尋碧雲寺

兩度屐痕新

樹老欹遮路

荆荒橫割人

穴中同水火

海外獨風塵

梵宇傳清磬

何人證淨因

### 火 山 口 （水火同源）

由來冰炭兩難投

水火偏驚一脈流

火上炎炎趨下水

穴前各自有千秋

### 乘 阿 里 山 火 車 登 山

起伏蜿蜒舞黑龍

穿山越澗任從容

萬年阿里饒神奧

卻喜桃源世外逢

### 堀 浪 湖

記遊日月兩名潭

堀浪而今任縱觀

水色山光無二致

小巫卻向大巫看

(湖較日月潭大五倍爲第一大湖惟地居卑下不若日月潭之出名)

### 平遮那望堀浪湖

萬壑千巖水亂流

卻教堀浪一齊收

明湖萬頃平如鏡

美盡三臺歎莫儔

### 十字路望番家

數間茅舍傍山厓

一帶清溪繞屋斜

高下梯田齊打稻

車人遙指化番家

### 阿里山圍爐

此日深山類謫居

八年以後一圍爐

溫情無限生春意

況值地天交泰初

### 阿里山閒行

策杖深山去

奇花不識名

綠苔鋪地軟

翠柏拂頭輕

峯合疑無路

鳥鳴聞處處

慰我旅途情

祝山觀日出

地閉天昏小徑幽

曉風刺骨遠凝眸

山高霜冷寧禁受

爲有光明在上頭

漸見連峯列眼前

又驚足下盪雲烟

火珠突迸玉山頂

無限光明燭大千

送施屏周院長

報道陞遷去

攀轅泣庶民

摘姦明似鏡

除暴直如神

和氣騰鯤島

仁波汜海瀛

大屯山色麗

遺愛共長新

題趙君壽珍雙紅樓詩集並贈

趙子騷壇傑

詩才海內空

閒愁澆大白

好句誦雙紅

甌北名難掩

終南夢未通

乘桴抒偉抱

鯤島一文翁

草山櫻花

慘白悽紅怨翅塵

草山孤負屐痕新

櫻花休訝無顏色

不是扶桑舊日春

鳥來

千巖萬壑裏

茅屋榜高墳

水沸身無垢

俗奇面有文

奔濤疑響瀑

登嶺恍騰雲

鐵索橋頭望

斜陽尙未曛

弔大湖明寧靖王墓

寇勢逼鯤島 無時盼中興 沼吳成夢想 復楚俟河澄  
望帝猶啼血 行人盡撫膺  
佳城西北向 終古望金陵

### 謁竹滬明寧靖王廟

遺廟荒村裏 愴懷寧靖王 恩能殉五女 烈可對高皇  
瀛海扶餘覆 厓山宋嗣亡 蕭蕭竹滬路 落日正蒼茫

### 虎頭埤

如帶高隄繞虎頭 千巖萬壑水齊收 開門開後田塍滿  
瘠土全教慶有秋 綠楊陰下小紅亭 檻外春山一抹青 三面波光明似鏡  
遏雲樵唱隔林聽

### 戊子年

### 指南宮

臺車捷若矢 去去絕紅塵 石磴千盤古 山花一望新  
連峯藏道觀 深壑出迷津 別是清涼地 誰醒夢裏身

### 悼聖雄甘地

奔走和平召殺身 瀛寰難望得和平 纔教絕食感同錫 偏是尋仇出弟兄  
復國方欣償夙願 闔牆猶憾少精誠 聖雄已死嗟何及 嗚咽恒河有恨聲



觀新疆青年歌舞團公演

繁絃急管異胡笳 飛燕驚鴻舞袖斜 高唱遏雲帕利達（女高音）濃情搖漾明娜娃（明娜娃唱娜芝古曲有云爲什麼我的心水銀似動搖著我和你見面的時候我心裡笑著情人娜芝舌）東來攜得天

山月 西去乘還博望槎 文化交流情浹洽 同胞團結捍中華

五十述懷

五秩光陰過白駒 依然故我悵今吾 豐祠淮上瞻韓信 遺廟射陽拜秀夫 東海會文  
闕器識 南雍負笈礪廉隅 最慚罔報重闡德 課讀深宵十載劬  
飄蓬身世記遊踪 揚子洞庭春水溶 眼小中原登泰岱 心雄大漠陟居庸 西窺金頂  
五千里 東躡玉山第一峯 九曲武夷驚逝水 會教起陸奮蛇龍  
坐弊青氈廿六秋 南中西蜀久淹留 慚非孔氏勞行腳 喜有門生作狀頭 桃李芳菲  
盈赤縣 文章聲價重神州 樹人大業仔肩任 教育英才樂未休  
知天命豈怨時乖 匏繫微官志未灰 傲骨難登傀儡席 脅肩競上鳳凰臺 名山大業  
書千卷 騷客沖懷酒一杯 窮善其身達善國 艱難世事正需才

# 附錄詩餘

## 一 翦梅 述懷

滿腹牢騷不肯消，似柳條條，似水迢迢。優存劣敗例難逃。縱不心焦，也自神搖。起舞深宵意氣豪，如雪兒刀，如鐵兒袍。莫教胡牧過臨洮。殲爾天驕，還我神臬。

## 洞仙歌

### 寒林

天寒歲晚，更西風無語。落葉蕭蕭亂辭樹，算深林怕負，錦瑟芳時。一隙隙，不放斜陽歸去。凍雲天際合。陣陣啼鴉，時向空林覓歸路。舊侶憶天涯，望斷關河。年華暮，閒愁如許。正詠罷新詞黯銷魂，卻不道青葱，此時非故。

### 寒燈

風淒月冷，正宵長如水。斜倚熏籠渾如醉。伴淒涼只有，一盞蘭膏。看點點，怕是深閨紅淚。當年輕小別。握手燈前，千萬叮嚀語應記。數載不歸來，盼斷鴻鱗。離情苦，玉人憔悴。且悶對銀缸數更籌，總敲斷金釵，慧心都碎。

三 姝 媚 詠夏柳

愁絲千萬縷。正飄搖江皋，倦腰慵舞。薄倖楊花，早度牆穿戶，暗隨春去。翠帶長條，渾未把東皇留住。老綠依依，攀折何堪，灞橋煙樹。舊日雷塘塵土。任廢苑螢穿，長隄蟬訴。昔日龍舟，問近曾來否。錦帆何處。流水年華，還消得斜陽幾度。莫問館娃宮畔，風風兩雨。

壽 樓 春

唐生乘輿從遊一載金陵名勝遍印鴻泥不幸於去夏逝世舊遊如夢往事成煙每一追思輒爲悵惘今者江南春暮草長鶯飛觸景興懷愴然賦此

添新愁春光。縱清明佳節，慵去尋芳。憶昔披榛鍾阜，泛舟長江。澆濁酒，瞻明王。步綠茵，晴郊倘伴。忽雨散花飄，樓空人去，嘉侶竟云亡。生如寄，情難忘。悵伊人渺渺，泉路茫茫。最恨英靈何在，夢中荒唐。塵榻冷，愁絲長。算海東還魂無香。奈依舊桃花，淒淒夕陽，悲北邙。

雙 聲 子

宵來月色漾清欲絕夢迴午夜五內縈迴既悼亡荆復悲飄梗爰因哀逝以抒情詎異登樓而作賦

夜涼於水，恨長如線，無言深掩重門。孤鴻身世，飄萍蹤跡，何事馬足車輪。衾寒似鐵。孤枕上，多少啼痕。傷情切，總難寐。更更寒柝愁人。想當年。方琴瑟靜好，金閨樂事無倫。天零紅粉，綠慳華首，無端玉碎珠焚。任花朝月午，徒惹起，怨舊愁新。幽懷正苦。一聲雁驚，又過南雲。

浦濱蕭國，白門燕市，堪憐南北奔勞。頻年羈旅，蕭齋岑寂，素娥屢伴無聊。金蘭協好。傾別緒，曾共良宵。歡難再，境全改。茫茫幽恨難消。看長空。星靜雲暮卷，桂輪擁出重霄。金波揚彩，銀蟾橫影，多情未把人拋。奈孤幃獨守，消瘦了，舊日豐標。開窗邀取。嬋娟可愁，碧落風高。

水調歌頭 春暮遊頤和園

國破故園在，風景似當年。棟花風信纔過，惆悵又春殘。水色山光依舊，燕語鶯啼如訴，憑眺總淒然。王業倏銷歇。春夢渺如烟。蝶魂瘦，花影亂，畫簾前。漪瀾堂下，東風冷煞舊遊船。兩兩三三楊柳，點點紛紛飛絮，做就奈何天。芳草一隄綠，歲歲送吟鞭。

萬壽古峯下，春水碧如油。滄茫萬頃冰鑑，出沒有沙鷗。曾沸當年簫鼓，又冷而今烟水，無語闕銅牛。（銅牛伏於湖濱，乾隆時物也）春色渾閒卻，禁柳也含愁。盪畫舫，碾菰菜，泛中流。八方亭下，波冷十七孔橋頭。似練西山凝黛，如帶長隄橫

翠，錯認在杭州（園有人工西湖之稱）。湖上好風景。何事此時遊。

塔影插霄漢，香界亂行雲。瓊樓玉宇相望，深鎖德暉門。銅殿石牆高峻，複室迷樓深邃，莫禁舊時春。墮粉正零落，水皺帶啼痕。紗窗靜，高閣閉，黯王孫。興亡一瞬，此日瞻拜總銷魂。借問斜陽流水，幾換春花秋月，故國蹟都陳。往事一回首，愁煞納涼人。（西后建園爲避暑行宮）

落日澹無語，王業付沈沙。榆烟杏火時節，有客感年華。迎旭樓前野草，諧趣園中流水，總被淡烟遮。聽鶴館前過，閣閣鬧鳴蛙。慨興廢，懷故國，淚如麻。紅愁綠慘，歌舞無復舊天家。湖外青山黯澹，鏡裏朱顏憔悴，檀板冷紅牙。遺恨幾時已，古木有啼鴉。

金

縷

曲

送菊軒赴魯西

懶折長亭柳。念天涯，萍踪絮跡，七旬聚首。肝膽相傾真血性，語爽情長意厚。曾幾度，煎茶溫酒。剪燭縱譚狐共鬼，忒新奇，大放懸河口。真可續，齊諧後。無端遠到天孫（泰山別名）右。莽乾坤，傳杯豪飲，幾時能又。此去定知遊懷暢，太白樓頭擊缶。更識個梁山屠狗。莫戀琴臺風光好。到梁溪，共賞黃花瘦。江左約，願同守。

解 連 環 寄 誓 流

騷懷易感，別友漸離，往事追思，尤增嗚咽，狂歌當哭，不知涕泗之何從也。

棟花風作。早榆錢滿地，桃花零落。記昔日訪勝東南，徧龜渚虎邱，綠楊城郭。歇浦潮寒，最難忘，聖湖丘壑。更滌陽遠涉，一枕祇園，世網都削。太白樓頭似昨。聽危磯激浪，情懷尤惡。自暮秋一別板橋，歎風打萍踪，天涯飄泊。萬種相思，待翦燭，細談離索。奈緣慳，境遷情變，悵懷舊約。

蘇 幕 遮 丙子春道出京門誓流送別江頭賦此誌感

雨絲絲，風片片。黯澹江頭，天也傷離散。一曲驪歌腸欲斷。乍聚還分，別恨如何遣。楚天遙，吳地遠。斷梗飄萍。浪迹風塵慣。握手臨歧心緒亂。兩地相思，魂夢紫江漢。

金 縷 曲 贈 金 聲

老綠鶯啼又。忒銷魂，榆錢滿地，棟花風驟。惟楚有材非妄誕，江漢鍾靈毓秀。記一室，商量研究。八月薰陶慚函丈，忽分攜，一曲驪歌奏。襄水畔，每懷舊。傷時淚濕青衫透，大中華，天驕蠶食，強權瓜剖。救國拯民男兒事，投筆休辭人後。

莫孤負，頭顱如斗。此去從戎親鋒鏑，待他年，大展好身手。同故土，光華胄。

早梅芳 賀江寧板橋小學遷校週年紀念

綠樹濃，飛花遽，輪奐新庠序。披荆芟棘。慘澹經營歷艱阻。羣知今日驩，寧解當年苦。喜兒童天真爛漫，讀罷競歌舞。作新民，任砥柱，壯志休輕負。學成業進，報國安家衛鄉土。無情江漢水，有恨京燕路。訴衷情，寄從雲裏去。

金縷曲 憲兵學校八週年紀念祝詞

憲校無量壽。八年來，經營慘澹，計全謀周。珊瑚宏張羅俊秀，個個龍驤虎驟。文武學，分程研究。訓練重於躬作戰。勤教育，無間宵和晝。成勁旅，忠元首。幾多覆雨翻雲手。莽神州，封建餘孽，橫行狂走。羅織何嫌莫須有，從古河清難候。賴袍澤，公忠共守。鋤奸發覆維章憲，齊做到，民保軍師傳。揚校譽，地天久。

念奴嬌 欣聞日本投降喜賦

爆聲如沸。聽爭傳，倭寇投降消息。往事思量，真可痛，巨變難忘七七。水咽蘆溝，潮寒歇浦，驀地烽烟直。哀哀華胄，盡罹紅羊厄。八載拉戰艱辛，生靈塗炭，萬里無完室。曾幾何時，神彈投，不見豺奔狼躡。血債應償，收回失地，自此銷鋒鏑。強權殲滅，全球同登衽席。

# 附錄詞餘

## 金陵懷古

(南曲商調金絡索) 黯然王氣消，已矣雄圖杳。孫馬劉蕭，曾此登神寶。陳郎顧盼豪，擁神臬，結綺臨春傑閣標。無端鐵鎖沈江表，何限繁華六代銷。到而今何處認前朝。弔故墟瓦碎磚拋。覽河山粉淨金飄。只贏得興亡歷歷愁資料。

(前腔) 烽烟西北飄。紫氣東南耀。小沙彌掃蕩羣豪，定鼎金陵早。千秋恨不消。說晴難咏鴟梟。竟把伽紗換袈裟。歎偏安未聞壯士恢神寶。徒聽君王選舞腰。堪悲悼離離黍黍麥苗高。午朝門松倒楸凋。五龍橋水咽風蕭。冷陵寢無人弔。

(前腔) 朱樓昔日高，甲第而今少。論美人盧氏名標，張孔尤窈窕。論名士烏衣巷久寂寥。燕尋巢。玉謝風流久歇銷。論英雄大功坊碑圯埋荒草。論才女小蒼山空房沒野蒿。增煩惱英雄紅粉一齊淘。名和功霧解冰消。美和妍雨散花飄。今古事眠一覺。

(前腔) 落星岡孰換貂。駐馬坡誰憑眺。淮水蕭蕭，猶帶秦名號。跨青溪少了半里橋。桃葉渡沒個老漁船。說法臺空那有天花似雨飄。可憐故國秋方老。不是南朝樹亦凋。月輪小空城夜打有寒潮。大江寬淘盡英豪。蔣山高閣盡興朝。更那堪蔓草糝糊了臺城道。

## 弔大明十三陵

癸亥暮春遨遊燕北憑眺長城道出十三陵下林木葱鬱碎瓦盈途動懷古之幽情  
便愴然而作賦

(風雨會四朝元)粘天芳草，遙峯插碧霄。指太行西峙，遼水東遶。重疊山四繞。更平原漠漠，更平原漠漠，只見虎踞龍蟠，萬壽山高。享殿巍巍，寶城高峭。福地誠天造。嗟。巨眼數人豪。萬乘親臨，曾此卜陵兆。橫溪造石橋。臨崖建神廟。深深隧道。長幽帝子，萬年難作。萬年難作。

(前腔)春光又老，回思鼎盛朝。自提兵建業，坐擁神泉，山河一統好。歎昇平日少，歎昇平日少。痛煞煞正德荒淫，吳鄧鄧天啓昏愒。小泰昌忽然的命送紅丸，莽正統險些兒身埋雪窖。驀地風波鬧。嗟。帝子煞英豪。國破城傾，卻掩面向煤山吊。還有那流落在緬甸臺灣。總沒個軹道輸降表。看而今柳烟破圯橋，水聲咽寒沼。雄風已杳。年年此日，子規哀叫。子規哀叫。

(前腔)寒烟籠罩，空山有鬼號。那陵門雲物，輦路蓬蒿，總做愁恨料。又滄桑換了，又滄桑換了。大石坊傾，神帛爐高。畫棟蛛封，御碑亭倒。稜恩殿點點燕泥落。嗟。幾隊塞鴻高。林木蒼蒼，萬點昏鴉噪。殘陽畫勝朝。荊棘沒華表。十三陵悄。清

清冷冷，沒人憑弔。沒人憑弔。

(前腔) 傷心股操，離離麥秀高。卻舊行宮圯，麻大菴杳，廢址都沒處找。對雲山殘照。對雲山殘照。翁仲無言，鼠兔營巢。永閉佳城，早乾龍沼。更糲糊了斷碣先人表。嗷。凝望總魂銷。芳草東風，荒原落日行人少。當塗碎瓦拋，傍陵古松老。繞幾聲牧笛吹了。便牛羊隊隊，出從陵廟。出從陵廟。

### 輓周母楊太夫人

(南越調) (霜天曉角) 烽烟陡上，平地風波盪。禍結兵連擾攘。田園廢，婦男亡。(換頭) 善人遭橫殃，婺星沈天壤。恨教慈容怎仰。風木慟，泣章江。

(小桃紅) 德門淑女，望族紅粧，閭教尤無上。也。全將德言工貌細參詳，譽滿四知堂。誰堪比守堅剛，度汪洋，質溫良，行謙讓。也。慣憐少小椿萱傍。咏絮才華兄弟行。

(下山虎) 甚生業障，世變年荒。陡的天災降。空無斗糧。那能够共聚一堂。事教撫養。羨小喬待字金閨得周郎。聘迎不待御百兩。卻喜衍龔斯俾熾昌。最憐忒嬌小，未識綺羅香。養媳生涯日月長。

(二犯排歌) 明星映窗，早醒睡鄉。氣寒甚雞停唱。不管夜長天冷，已離去紵帳，灑

掃了庭除，更登竈房。爨炊罷，忽忽獨浣漿。家貧數膳糧，食難一器，何嘗便療了饑腸。苦辛備嘗。孝聲播，不聽忤北堂。

(五般宜)曾聽得恤孤寒，贈錦裳。曾聽得憐窘苦，助春糧。曾聽得施棺木，捐嫁妝。節衣食，輸將解囊。還有仁恩洪蕩，哀殘念盲。慈幼敬尊和鄰，溫厚慈祥。這聲名傳戚鄰。

(本宮賺)孝順北堂，飲食鹽櫛資供養。卅年似一，曲盡婦規無怨謗。災遭無妄。瘡痍蔓生臥病床。壞膿潰液流腰項。搔痛癢，侍湯煮藥，少有這賢心臟。鎮天依傍。

(鬪蛤蠅)鵲橋架，成烟眷，花燭洞房。添喜氣，結同心，神仙比仿。卅載靜好歡無量。婿倡婦隨賢行媿孟光。家漸康。宗漸昌。更喜子女成行。後福正長。

(五韻美)歌弄璋，石麟降。生兒亢宗，畢竟推慶光。他曾經白下恣酬唱。他曾經中州懸絳帳。他曾經治省校作寧都長。他更經聘文才京門赴選場。第一姓名香，士林敬仰。(羅帳裏坐)猛然的羣凶跳梁。紅旗亂颺。歎薰天赤燄，萬山屏障。殘殺焚掠，雨酸風狂。僞都怎也號中央。叛國殃民，畢竟是共黨。

(江頭送別)資財盡，田地了，禍禳未央。全家散，苦誅求，慘遭拘綁。一朝撒手歸天上。仙凡自此隔霄壤。

(尾聲)大野一棺誰埋葬，雨風龍霧忒淒涼。白下招魂更斷腸。

民國三十七年四月二十日初版

定價 台幣五百六十元

外埠郵匯寄費照加

著作人 薛建香

發行人 李錦和

印刷所 華文堂印書局

臺北市西園路一段二三四巷九號

代售處 中華書局臺灣分局

臺北市重慶南路一段九十四號

版權所有

翻印必究



中華民國五拾柒年壹月拾捌日

贈